

PRIMAVERA

E quannu s'arruspigghia primavera
mi pari un jocufocu di culura
chi rallegranu la cilesti sfera,
ma vinci ogni artificiu la natura
e c'è nall'aria 'na maBa chi ddici
cu li ciuri, l'aceddi e la calura
chi propriu s'avi ad essiri filici
e chi veni l'estati 'un viri l'ura
pi jittari luntanu la cuperta
pi nescitinni di 'sti quattru mura
e gòriri la vita all' aria aperta!
Russi li paparini 'n mezz'all'ervi
e giarni e bianchi su' li margariti;
jetta 'stu capputtazzu. A chi ti servi?
Fineru i tempi di li purmuniti!
Natura rinverdisci e tu chi fai?
Gùstati 'sta staciuni 'mprofumata
e scotula luntanu li to' vai!
Ora cumincia la vita biata,
di goritilla 'un ti scurdari mai!
Si spoghianu li beddi 'nna li spiaggi
li longhi jammi affusulati e lisci
vannu trippiannu li putri sarvaggi,
e l'occhju gori e 'u desideriu crisci
ed a quarcunu ci arresta nne argi,
ch'un su' cosi pi vecchi si capisci;
cuntintativi sulu di tali ari
sta bedda giuvintù chi nni ciurisci
e siddu aviti li mughieri lari
anticchia 'i fantasia vi l'abbillisci!

Salvatore Ingrassia

Da "Spiragli", anno XX n.2, 2008, pag. 48.